

每週經課朗誦經文(巴克禮漢羅/教羅)2015/07/05

共同經課 - 1

撒母耳記下五章一節~五節，九節~十節

1 當時以色列眾支派到 Hi-pek-lûn，見大衛講，看 ah，阮是你 ê 骨肉。2 前掃羅做阮 ê 王 ê 時，chhoā 以色列出入 ê 是你；耶和華也 bat kā 你講，你 beh 照顧我 ê 百姓以色列，也 beh 做以色列 ê 君王。3 Tùi án-ni，以色列 ê 長老 lóng 來 Hi-pek-lûn 見王。大衛王 tī Hi-pek-lûn 耶和華 ê 面前 kap in 立約。In 就用油抹大衛做以色列 ê 王。4 大衛坐位 ê 時三十歲，伊坐位四十年。5 Tī Hi-pek-lûn 做猶大王七年 koh 六月日；tī 耶路撒冷做 thong 以色列 kap 猶大 ê 王三十三年。9 大衛 tiàm tī 衛所，稱 hit 所在做大衛 ê 城。大衛 tùi Bí-lô 四圍起造，也 òng 內面。10 大衛 ná 久 ná 強盛，因為耶和華萬軍 ê 上帝 kap 伊 tī-teh。

共同經課 - 2

詩篇四十八篇

1 Khó-láh 後裔 ê 詩歌。1) 耶和華至大，應該大大得 tiòh o-ló；就是 tī 咱上帝 ê 城，tī 伊聖 ê 山。2 錫安山，大君王 ê 城，tī 北面，高大 koh 好看，hō 全地所歡喜。3 上帝 tī 伊 ê keng-殿內，家已顯明做高台。4 看 ah，列王聚集，In 相 kap tùi-chia 經過。5 In 看見就 gông-ngiáh；驚惶 kín-緊走。6 In tī-hia ngiáuh-ngiáuh-chhoah，痛疼親像生 kiáⁿ ê 婦人人。7 你用東風，Phah 破 Tha-si ê 船。8 阮 tī 萬軍 ê 耶和華 ê 城中，就是阮 ê 上帝 ê 城中，所看見-ê tú-tú 照阮所聽見；上帝 beh hō chit-ê 城堅固到永遠。[Sè-láh]9 上帝 ah，阮 tī 你 ê 殿內，Siàu 念你 ê 慈愛。10 上帝 ah，你所受 ê o-ló，Tú-tú kap 你 ê 名相合，到 tī 地極。你 ê chiáⁿ 手滿滿公義。11 因為你 ê 判斷，錫安山 tiòh 歡喜，猶大 ê 城 tiòh 快樂。12 Lín tiòh sèh 錫安，四圍行伊，算伊 ê 城樓，13 詳細看伊 ê 城牆，省察伊 ê 王宮，Beh hō lín 宣傳 tī 後代。14 因為 chit-ê 上帝永永遠遠做咱 ê 上帝；伊 beh chhoā 咱到 tī 死 ê 時。

共同經課 - 3

哥林多後書十二章二節~十節

2 我 bat 一人 tiàm-tī 基督 ê，十四年前受帶到第三層天；或是 tiàm-tī 身軀，我 m̄ 知；或是無 tiàm-tī 身軀，我也 m̄ 知；上帝知。3 我 bat 一個親像 chit 號 ê 人，或是 tiàm-tī 身軀，或是無 tī 身軀，我 m̄ 知，上帝知；4 伊受帶到樂園，聽見 boē 得 thang 講 ê 話，就是人所 m̄-thang 講 ê。5 我 beh 為 tiòh chit 號人誇口；但是為 tiòh 家己，除我 ê 軟弱以外，我無 beh 誇口。6 我若 ài beh 誇口，也 m̄ 是躉，因為我 beh 講真實；總是我家已約束，驚了人 ê 評論我 khah 過頭 tī 伊所看見我，á 是伊 tùi 我所聽見 ê。7 Koh 因為 chiah-ê 啟示 ê 極大，免得我過頭自高，所以 hō 我肉體內有刺，就是撒旦 ê 使者來 phah 我，免得我過頭自高。8 為 tiòh án-ni，我三 pái 求主，hō hit-ê 離開我。9 伊 kā 我講，有我 ê 恩，你就夠額；因為我 ê 氣力是 tī 人 ê 軟弱來成。所以我真歡喜，khah ài 誇口我 chiah-ê 軟弱，hō 基督 ê 氣力 toà tī 我。10 所以我為 tiòh 基督掠 chiah-ê 軟弱、欠缺、khún-tiók、困迫做歡喜；因為我軟弱 ê 時，反 tng 有氣力。

共同經課 - 4

馬可福音六章一節~十三節

1 耶穌 tùi hia 出去，到伊 ê 本鄉，伊 ê 學生 tè 伊。2 到安歇日就 tī 會堂教示人。Choē-choē 人聽見就奇怪講，Chit-ê 人 tùi tá-lòh 會 án-ni ah？koh 所賞賜 hō 伊 ê 智慧是甚麼 ah？也有 án-ni ê 大權能 tùi 伊 ê 嘴出，是怎樣？3 Chit-ê kiám m̄ 是木工 mah？kiám m̄ 是馬利亞 ê Kiáⁿ，雅各、約西、猶大、西門 ê 兄弟 mah？伊 ê 姊妹 kiám m̄ 是 kap 咱 tī chia mah？In 就厭賤伊。4 耶穌就 kā in 講，先知 tī 本鄉、宗族，家己 ê 家以外，無 m̄ 尊貴。5 伊 tī hia boē 得行甚麼權能，不過用手 hoāⁿ kúi-nā ê 病人，來醫好 in。6 Koh 奇怪 in m̄ 信。就四界行 hiah-ê 鄉社，教示人。7 耶穌召十二個學生來，就差 in 一對一對出去，賞賜 in 有權來制壓 hiah-ê 邪神；8 koh 吩咐 in 莫得帶路費，獨獨一支柺 á，莫得乾糧，莫得 tah-liân，莫得 khng 錢 tī 腰帶；9 tiòh 穿出露 ê 鞋；也莫得穿兩領衫。10 Koh kā in 講，見若 lín 所入 ê 厝，tiòh toà tī hia，直到離開 hit-ê 地方 ê 時。11 無論甚麼所在 m̄ 接納 lín，m̄ 聽 lín ê，到離開 hia ê 時，tiòh 拌去腳 chiah 底 ê 土粉，來對 in 做干證。12 In 就出去宣傳，講人 tiòh 反悔。13 In 也趕出 choē-choē 鬼，用油抹 choē-choē 破病 ê 人，醫好 in。